

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XXXVII Blg. 13
Hulyo 7, 2006
www.philippinerevolution.org

Editorial

Itigil ang mga pagdukot, lihim na pagbibilanggo at iba pang karahasan sa mamamayan


Labis na karuwagan ang ipinamamalas ng rehimen ng US-Arroyo sa ginagawa nitong walang habas na mga pasistang pag-atake sa mga aktibista, ordinaryong mamamayan, mga rebolusyonaryong pwersa at mga inaakusahan nitong komunista. Ang hindi nito kayang gawin nang harapan, gagawin nito nang patraydor, sa pamamagitan ng mga halimaw na *death squad* at mga espesyal na operatibang walang nirerespetong karapatan at walang sinasantong batas, maging mga batas sa bansa at mga pandaigdigang batas. Nilalait at dinuduraan pa nila ang mga kasunduang nakamit sa usapang pangkapayapaan sa pagitan ng rebolusyonaryong kilusan at ng kanilang guberno.

Animo'y mga nauulol na halimaw ang mga *death squad* na pinakawalan ni Arroyo. Ang mga pinaghihinalaang rebolusyonaryo ay marahas na sinasaklot, lihim na ibinibilanggo sa madi-dilim na kuta,

dinadahas, nilalason at pinagkakaitan ng kahit kating na pagkatao. Walang mga dokumento. Walang mga abugado. Walang pag-aasal-tao. Buhay ang kapalit oras na hindi masunod ang kagustuhan ng mga halimaw.

Walang inaamin si Arroyo at ang kanyang mga alipures. Namimilipit ang mga ito sa pagtanggihan ng kahit pa may mga ebidensya at saksi. Nagbibingi-bingihan lamang si Arroyo sa harap ng umaalingawngaw na kahalilingan ng mga kamag-anak, kaibigan, mga nagtataguyod ng kanilang karapatang-tao at iba pang mamamayan na ilitaw at respektuhin ang karapatan ng mga biktima. Sa harap ng labis na hinagpis ng mga nababahala sa kalagayan ng kanilang mga pinagmamalaskitan, hindi maitago ang kagalakan ng rehimen at mga alipures nito sa militar: Magandang bagay, anila, na dinukot at nawawala ang mga rebolusyonaryo.

Ang "*all-out war*" ni Arroyo



Mga tampok sa isyung ito...

Palayain ang mga dinukot na konsultant ng NDF PAHINA 3

Malawak na suporta sa panibagong impeachment PAHINA 8

Mga tagumpay ng mga Maoista sa Nepal PAHINA 12

ay walang kinikilalang batas o alituntunin, maging yaong nasa sari-ling konstitusyon o mga internasyunal na batas tulad ng nasasaad sa Geneva Conventions, at maging mga kasunduan ng NDFP at GRP hinggil sa pagrespeto sa karapatang-tao at paggarantiya sa kaligtasan at di pag-aresto sa mga kalahok sa usapang pangkapayapaan.

Armado man o sibilyan ay hindi pinag-iiba ng mga berdugo ng rehimen. Ang lahat ay kaaway sa kanilang mga mata. Ikinakatwiran nilang mayroon silang lisensyang gawin ang gusto nilang gawin, yurakan ang karapatang-tao at pagpaghariin ang pasistang batas saan man nila naisin. Masahol pa, ang mga kumikilos sa larangang ligal at mga di armadong sibilyan ang siya pang mga pangunahing tinutugis at pinapatay.

Sa ngalan ng “*all-out war*,” isinasagawa ng rehimen ang walang habas na pambobomba, pwersahang pagpapalikas, pagboblakeyo sa pagkain at kabuhayan at pagso-sona sa mga komunidad na pinaghihinalaan nilang binasehan at pinupugaran ng rebolusyonaryong kilusan. Pinakakahindik-hindik ang mga krimen ng rehimen at ng mga

armadong pwersa laban sa mamamayan sa mga lugar na ito. Dito’y umaasta ang mga pasista na mga diyos na may kontrol sa buhay at kamatayan ng mga tao. Naririyang pasukin ang mga bahay sa disoras ng gabi at bulabugin ang katahimikan, palabasin ang mga lalaki, pahirapan at tuluyang patayin. Napakaraming kaso na ang mga babae ay binabastos, dinadahas at ginagahasa. Wala silang pakundangang pagmalupitan ang mga bata. Tina-takot ng rehimen ang Arroyo ang mamamayan sa desperadong hangaring talikuran nila ang BHB at yumukod sa pinaiiral na di deklaradong batas militar.

Maging ang ligal na larangan ng pakikibaka para sa mga pagbabagong panlipunan ay pilit ding ipinagkakait ng rehimen ang Arroyo sa patriyotiko at demokratikong kilusan. Ang mga progresibong lider at aktibista at maging mga tagasuporta ay kaliwa’t kanang ginagawang pan-*target practice* ng mga berdugong *death squad* na pinakawalan ng rehimen para atakehin ang demokratikong kilusan sa iba’t ibang lugar sa bansa. Ang mga mapayapang nagtitipon, nagrurali at nagpapahayag ng mga hinaing ay

sinusupil. Pati mga halal na progresibong mambabatas ay pinagbabalakang pagkaitan din ng puwang sa larangang parlamentaryo at ligal. Nais silang gipitin at ikulong sa pamamagitan ng gawa-gawang mga kaso.


Nagkakamali si Arroyo sa pag-aakalang makapagdudulot ng matinding pinsala ang ginagawa nitong lihim na pagdukot, pagbibimbina at pagpaslang sa mga rebolusyonaryo at pinaghihinalang mga rebolusyonaryo, gayundin ang ginagawa nitong pamamaslang, panggigipit at pananakot sa mga kumikilos sa larangang ligal.

Inaakala ng rehimen ang Arroyo na tatahimik na lamang ang mamamayan sa harap ng mga karumal-dumal na krimeng ginagawa sa kanila ng mga armadong galamay at berdugo nito.

Abot-langit ang pagkapoot ng mamamayang Pilipino sa kalupitan at brutalidad ni Gloria Arroyo. Laluna mula nang hibang na ideklara niya ang “*all-out war*” at tahasang ibasura ang usapang pangkapayapaan, ibayong walang habas ang patraydor nitong mga pagdukot, sikretong pagbibimbina, pagtorturyar at pagpatay.

Mabibigo ang duwag na mga anti-demokratiko at anti-mamamayang atakeng ito ng rehimen. Kailanman ay hindi maiimpit ang sigaw ng mga biktima ng pasistang karahasan ng rehimen ang Arroyo. Ang kanilang mga sigaw ay patuloy na aalingawngaw at pupukaw sa bayan. Kikilos at kikilos ang mamamayang Pilipino hanggang sa maibagsak at maparusahan nila ang bulok, papet at pasistang rehimen at mga susing galamay nito.

Handa ang PKP, Bagong Hukbong Bayan at ang buong rebolusyonaryong kilusan na gumawa ng katugong aksyon at kamtin ang katarungan para sa lahat ng biktima ng paglabag sa karapatang-tao at karahasan ng pasistang rehimen. **AB**

 <p>Taon XXXVII Blg. 13 Hulyo 7, 2006</p> <p>Ang <i>Ang Bayan</i> ay inilalabas sa wikang Pilipino, Bisaya, Iloko, Hiligaynon, Waray at Ingles.</p> <p>Maaari itong i-download mula sa Philippine Revolution Web Central na matatagpuan sa:</p> <p>www.philippinerevolution.org</p> <p>Tumatanggap ang <i>Ang Bayan</i> ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikau-unlad ng ating pahayagan. Maaabot kami sa pamamagitan ng email sa:</p> <p>angbayan@yahoo.com</p>	
<h2>Nilalaman</h2>	
Editorial	
Itigil ang mga pasistang karahasan	1
Pananalanta ng pasistang estado	
Palayain ang mga dinukot	3
Mga paglabag sa karapatang-tao	4
Usapang pangkapayapaan	5
Mga hakbang tungong batas militar	6
Matatagumpay na TO	7
Malawak ang suporta sa <i>impeachment</i>	8
Sunud-sunod na kaso	9
Masiglang edukasyong masa sa Cagayan	9
CARP: Maanomalya at inutil	11
Sa ibayong dagat	
Mga tagumpay ng mga Maoista sa Nepal	12
Iligal ang pagbibimbina sa Guantanamo	13
Mga missile ng North Korea	14
Balita	15
<p>Ang <i>Ang Bayan</i> ay inilalathala dalawang beses bawat buwan ng Komite Sentral ng Partido Komunista ng Pilipinas</p>	

Palayain ang mga dinukot na konsultant at istap ng NDFP

Mariing kinukundena ng Partido Komunista ng Pilipinas ang pagdukot at sikretong pagbibimbina sa dalawang konsultant ng NDFP sa usapang pangkapayapaan, dalawang istap ng NDFP at mga sibilyang idinamay sa pagdukot sa kanila. Tahasang niyuyurakan ng rehimen ng Arroyo at mga armadong pwersa nito ang mga internasyunal na makataong batas, mga alituntunin sa digmaan, ang Comprehensive Agreement on Respect for Human Rights and International Humanitarian Law at ang Joint Agreement on Safety and Immunity Guarantees.

Hinarang at dinukot ng mga operatibang militar si Prudencio Calubid, konsultant ng NDFP sa usapang pangkapayapaan, sa pribinsya ng Quezon noong Hunyo 26. Dinukot din kasama niya ang kanyang istap na sina Ariel Beloy at Ka Goyong, ang kanyang asawang si Celina Palma at kamag-anak niyang si Gloria Soco. Si Soco ay isinabay lang nila sa byahe at walang kaugnayan sa rebolusyonaryong kilusan.

Nakatakas si Ka Goyong kinabukasan ng gabi at siyang nagpaabot sa NDFP ng mga karumal-dumal na detalye ng pagpapahirap sa mga biktima.

Ayon sa kanyang salaysay, sa sasakyan pa lamang ay sinimulan na silang saktan. Pinirangan sila, pinosasan at itinali ang kanilang mga paa.

Mula Hunyo 26 hanggang 27 ay tatlong *safehouse* sa iba't ibang lugar ang pinagdalan sa kanila, kung saan tuluy-tuloy silang tinortyur at ipinailalim sa matinding interogasyon. Kabilang sa mga nakaranas ng grabeng pagpapahirap ang mga sibilyang kasama nila.

Subalit ang tinortyur nang husto, ani Ka Goyong, ay si Calubid mismo. Sa isang pagkakataon ay narinig niyang sumigaw si Calubid na "Wala kayong makukuha sa akin! Patayin niyo na lang ako!"

Pagsapit ng Hunyo 28, dinala

sila sa isang magubat na lugar. Habang nasa sasakyan pa lamang sila ay nagbanta na ang mga berdugo na papatayin na sila. Pagkababa sa sasakyan, napansin ni Ka Goyong na malayo na sila sa kalsada dahil dalisdin na ang kanilang nilalakaran at may narinig siyang lagaslas ng tubig sa gawing ibaba.

Upang kunin ang atensyon, sumigaw si Beloy ng "Mabuhay ang Partido Komunista ng Pilipinas! Mabuhay ang Bagong Hukbong Bayan!" Sinamantala ni Ka Goyong ang nilikha nitong bahagyang kaguluhan para makatakas. Ubos-lakas niyang binalya ang humahawak sa kanya at nang makahulagpos ay tumalon pababa ng dalisdin sa direksyon ng tubig palayo sa kaaway. Pinaulanan siya ng bala habang pagulong-gulong siya pababa pero hindi siya tinamaan. Dalawang araw siyang nagtago sa gubat na sa kalauna'y napag-alaman niyang bandang Cavinti, Laguna. Naugnayan niya ang mga kasama at iniulat ang mga pangyayari.

Noon namang Hunyo 24, dinukot din sa Barangay Tuktukan, Guiguinto, Bulacan si Leonardo Ancheta, isa pang tauhan ng NDFP. Ayon sa isang saksi, nanlaban si Ancheta subalit pinagtulungan siya ng apat na armadong lalaki at sapilitang ipinasok sa isang kulay pilak na Toyota Revo.

Noong Hunyo 17, bandang

alas-7:00 ng umaga sa Barangay Bangkuruhan, Calauag, Quezon, dinukot si Rogelio Calubad, konsultant ng NDFP na kumakatawan sa Bikol. Dinukot din ang anak niyang si Gabriel, isang *electrician*. Ayon sa mga saksi, ginitgit ng isang *van* ang sinasakyan nilang motorsiklo kaya tumilapon ang mag-ama. Si Calubad ay agad pinosasan at isinakay sa *van*, samantalang si Gabriel ay sapilitang iniangkas sa isang kasunod na motorsiklo.

Sa kabila ng mga pagsisikap ng mga kamag-anak, abugado at taga-pagtaguyod ng karapatang-tao na hanapin at igiit ang pagpapalitaw sa mga dinukot na konsultant at istap ng NDFP at sa mga sibilyang idinamay sa pagdukot sa kanila, patuloy na itinatangi ng AFP at PNP na hawak nila ang mga biktima.

Ang naturang mga *desaparecido* ay pinakahuling biktima ng maruming gera ng rehimen ng Arroyo at mga armadong galamay nito. Dahil wala itong sinasanto, maging mga inosenteng sibilyan ay idinadamay ng mga pasistang berdugo ni Arroyo.

Iginigiit ng Partido na ilitaw at palayain ang mga konsultant ng NDFP na sina Prudencio Calubid at Rogelio Calubad, mga istap ng NDFP na sina Ariel Beloy at Leonardo Ancheta at mga kamag-anak nilang sina Celina Palma, Gloria Soco at Gabriel Calubad.

Ipinapangako ng Partido at Bagong Hukbong Bayan na gagawin nila ang lahat ng makakaya di lamang para pagbayarin nang mahal ang mga responsable sa pagdukot at pagpapahirap sa kanila, kundi ang lahat ng may kagagawan ng walang habas na mga pamamaslang at iba pang karumal-dumal na paglabag sa karapatang-tao. **AB**



na simpatisador umano ng BHB.

Hunyo 25. Tinakot ng mga elemento ng 69th IB ang 177 manggagawang naglulunsad ng seminar sa Barangay Pulong-bulo Elementary School sa Angeles City.

Batay sa pahayag ni Ludynela Hamor, presidente ng Smart Shirts Philippine Inc. Union, tatlong nakasibilyang mga sundalo ang dumating at nagtatatanong tungkol sa aktibidad ng mga manggagawa, kung sino ang organisador nito at sinu-sino ang mga lider ng nasabing unyon.

Hunyo 25. Dalawang babaeng estudyante ng University of the Philippines na nagsasagawa ng pananaliksik at isang lalaking aktibistang magsasaka ang dinukot ng militar sa Hagonoy, Bulacan. Hanggang ngayon ay hindi pa inililitaw ng AFP ang mga mananaliksik na sina Karen Empeño at Sherlyn Cadapan at ang

aktibistang si Manuel Merino.

Hunyo 24. Dinukot sa Barangay Tuktukan, Guiguinto, Bulacan ng apat na lalaking armado ng malalakas na armas si Leonardo Ancheta, istap ng NDFP. (Tingnan ang kaugnay na artikulo.)

Hunyo 17. Dinukot ng anim na pinaghihinalaang elemento ng Intelligence Service of the AFP si Rogelio "Rudy" Calubad, 53, konsultant ng NDFP sa usapang pangkapayapaan na kumakatawan sa Bikol. Kasama niyang dinakip sa Barangay Bangkuruhan, Calauag, Quezon ang kanyang anak na si Gabriel, 29. Hindi pa rin inililitaw ng militar ang mag-ama.

Hunyo 13. Sinalbeyds ng mga elemento ng 21st IB si Roberto Gonzales, 38, magsasakang taga-Barangay Ab-abaan, Balbalan, Kalinga. Dinukot si Gonzales noong Hunyo 9 at ilang araw na tinortyur bago pinatay. Inakusahan siyang tagasuporta ng BHB. **AB**

Usapang pangkapayapaan, ipinupursige ng NDFP

Ipinamamalas ng rehimeng Arroyo na wala itong interes na kamtin ang matagalang kapayapaan sa patuloy na pagtanggihan ng mga pagsisikap ng National Democratic Front of the Philippines (NDFP) na maipagpatuloy ang usapang pangkapayapaan.

Tumungo ang NDFP *negotiating panel* sa Oslo, Norway para kausapin ang mga upisyal ng gubyrernoon na tumatayong Third Party Facilitator sa negosasyon sa pagitan ng NDFP at ng Gubyrernong Republika ng Pilipinas (GRP). Pangunahing layunin ng konsultasyon ang pag-aaral sa posibilidad ng pagpapatuloy ng usapang pangkapayapaan; at ng pagpapatuloy ng iba pang mga trabaho kaugnay ng negosasyong pangkapayapaan, pumayag man o hindi ang rehimeng Arroyo na muling buksan ang pormal na pag-uusap.

Pinag-usapan din kung papanong magiging mas epektibo ang Joint Monitoring Committee para sa pagpapatupad ng Comprehensive Agreement on Respect for Human Rights and International Humanitarian Law (CARHRIHL). Ito'y sa harap ng tumitinding mga pag-

labag sa karapatang-tao sa Pilipinas.

Taliwas sa layunin ng NDFP, nagpadala rin ang GRP ng delegasyon sa Norway pero para lamang ipabatid doon na hindi ito bukas na makipag-usap dahil abala ito sa paglulunsad ng to-dong-gera laban sa rebolusyonaryong kilusan. Walang magawa ang gubyrernong Norway kundi sabihing nirerespeto nito ang paninindigan ng GRP.

Nakikipag-usap din ang NDFP sa iba pang mga pwersa at sektor, kabilang na ang mga taong-simba-

han at iba pang naghahangad ng matagalang kapayapaan. Nakikipag-ugnayan din ito sa oposisyong pulitikal sa layuning hawanin ang daan para sa usapang pangkapayapaan sa harap ng pagsasara rito ng papet-pasistang rehimeng Arroyo. Sa batayan ng ganitong ugnayan, inaasahang magiging mas madali ang pagpapatuloy ng pag-uusap oras na mapabagsak ang kasalukuyang rehimen.

Kaugnay nito, naging matagumpay ang idinaos na pag-uusap sa pagitan ni Sen. Consuelo "Jamby" Madridal at mga kinatawan



ng NDFP *peace panel* sa The Netherlands sa pamumuno nina Kasamang Luis Jalandoni, Jose Ma. Sison at Fidel Agcaoili. Matapos ang dalawang araw na dayalogo, nilagdaan nila noong Hunyo 27 ang kanilang pinag-isang pahayag. Isinaad sa pahayag na ang rehimeng Arroyo ang kagyat na responsable sa pinakamabibigat na problema ngayon sa Pilipinas. Iginiit din doon na kailangang pagkaisahin ang mamamayang Pilipino para lutasin ang armadong tunggalian at kailangang maipagpatuloy ang usapang pangkapayapaan sa pagitan ng GRP at ng NDFP.

Pinuna nito ang dumaraming paglabag sa karapatang-tao at ang “*all-out war*” ng rehimen laban sa mga rebolusyonaryong pwersa at sinabing makapagpapalala lamang ito sa krisis pampulitika at suliraning sosyo-ekonomiko ng bansa.

Mahigpit silang nanawagan na muling buksan ang usapang pangkapayapaan at pagtulungang malalis ang bansag na terorista sa PKP-BHB at kay Jose Ma. Sison, punong konsultant sa pulitika ng NDFP.

Sa kabila ng matayog na hangarin ng pakikipag-usap ni Senator Madrigal, ang kanyang inisyatiba ay labis na binatikos at ibinasura ng rehimeng Arroyo. Binantaan pa siyang kakasuhan ng “pagtataksil sa bayan,” sedisyon at kung ano pa ang maisip nila.

Bago pa ito, kumukulo na ang dugo ng rehimeng Arroyo kay Madrigal dahil sa pagtutulungan nila ni Cong. Satur Ocampo ng Bayan Muna sa paghahatid sa United Nations High Commissioner for Human Rights (UNHCHR) sa Geneva, Switzerland ng mga reklamo tungkol sa malawakang paglabag sa karapatang-tao sa ilalim ng rehimeng Arroyo.

Ang patuloy na pagmamatigas ng rehimeng Arroyo ay muling nagpapatunay na mas interesado itong

maglunsad ng todo-largang gera sa halip na lutasin ang mga panlipunang ugat ng kasalukuyang digmaang sibil. Inaatake nito maging ang mga pwersang nasa ligal na arena at lahat ng hindi sumasangayon sa bulok, mapaniil, anti-de-

mokratiko at anti-mamamayang pakatakaran at programa nito.

Sa pagmamatigas ni Gloria Arroyo sa militaristang solusyon, sadyang magiging mahirap isulong ang usapang pangkapayapaan sa ilalim ng kasalukuyang rehimen. **AB**

Paglalatag ng mga hakbang tungong batas militar

Tuso at sistematiko nang inilalatag ng Malakanyang ang mga katwiran, saywar at iba pang paghahanda para sa ibayo pang panunupil sa mga lumalabang mamamayan, laluna sa mga progresibong maslider at aktibista, sa malawak na demokratikong kilusan at sa mga nagrerebeldeng pwersang militar. Ayon mismo sa matataas na upisyal ng rehimen, maaaring humantong ang kanilang mga hakbang sa deklarasyon ng batas militar.

Pinakahuling ginamit na sangkalan ng rehimeng Arroyo ang isang bidyong nagpapakita kay Gen. Danny Lim, dating kumander ng 1st Scout Ranger Regiment, kasama ang tatlo pang kapwa upisyal na nagbabasa ng deklarasyon ng pag-atras ng kanilang suportang militar sa rehimeng Arroyo para mawakasan na ang paghahari ng bogus at kriminal na pangulong Arroyo at palitan ito ng bagong gubyerno. Ipinalabas ang naturang bidyo ng ABS-CBN nitong Hulyo 3.

Walang paliwanag kung paanong “bigla na lamang” dumating ang bidyo sa tanggapan ng ABS-CBN. Bagamat wala pang tahasang nalalabag na batas at nasa hangganan pa ng larangang ligal ang pag-uurong ng suportang militar sa rehimen, ginagamit na ng Malakanyang ang deklarasyong binasa ni General Lim para palabasing mayroon ngang tangkang kudeta noong Pebrero. Patunay umano itong may batayan ang pagdedeklara ng State of National Emergency (SONE) at paglalabas ng Presidential Proclamation 1017.

Bago pa ito, ilang linggo na ring may “misteryoso” at “di-maipaliwanag” na mga pagsabog ng mahihinang bomba sa iba’t ibang lugar sa Metro Manila at iba pang syudad, pangunahin na sa mga kampo at pasilidad ng pulisya. Ayon kay National Security Adviser Norberto Gonzales, gawa raw ito ng mga “*destabilizer*” na “*tiyak*” na manggugulo hanggang sa State of the Nation Address ni Arroyo sa Hulyo 24.

Kaakibat ng lahat ng mga pangyayaring ito, ipinauna na ng Malakanyang na di lamang State of National Emergency (SONE) kundi batas militar pa ang maaari nilang ideklara kaugnay ng mga “bantang destabilisasyon.” Tahasang sinabi ni Executive Secretary Eduardo Ermita na ang pagdedeklara ng SONE noong Pebrero 24 ay unang yugto pa lamang ng gradwal na paggamit ng kapangyarihan ng gubyerno. Aniya, “Mas may kumpyansa na kaming magdeklara muli ng SONE kapag kinakailangan... Ang mga susunod na hakbang ay makakahalintulad ng mga ginawa ni Marcos noong maagang bahagi ng dekada 1970—ang pagsususpende ng *writ of habeas corpus* at kasunod niyon ang pagdedeklara ng batas militar.” **AB**



5 armas, nasamsam sa ambus sa Masbate

TATLONG M16, dalawang maiikling baril, mga bala at isang radyong VHF ang nasamsam ng Bagong Hukbong Bayan nang ambusin nitong ang *private army* ng isang despotikong panginoong maylupa sa Barangay Casa Batuan sa Ticao, Masbate nitong Hunyo 29.

Tinambangan ng mga Pulang mandirigma bandang alas-5:00 ng umaga ang *goons* ni Bobie Honasan, na malaon nang isinusumbong ng mga magsasaka sa lugar dahil sa mga kriminal na pananagutan niya sa masa.

Ayon sa pagsisiyasat ng mga rebolusyonaryong organisasyong masa sa erya, mahigit 300 magsasaka ang pinalalayas ni Honasan

sa tig-isang libong ektaryang Hacienda Honasan at Hacienda Ara. Ipinasunog din niya ang mga bahay ng ilang magsasaka.

Dalawang myembro ng kanyang *private army* ang namatay sa labanan.

Ang pananambang sa *private army* ay halos kasabay ng operasyong harasment ng BHB sa kampo ng Regional Mobile Group ng Philippine National Police (RMG-PNP) sa San Jacinto, Ticao kung saan malubhang nasugatan ang isang elemento ng RMG.

Kasabay ding hinaras ng mga Pulang gerilya ang kampo ng Philippine Army sa Barangay Armenia, Uson.

Armori ng meyor nireyd ng BHB, 5 armas nasamsam

LIMANG armas ang nasamsam ng mga gerilya ng Henry Abraham Command ng BHB nang salakayin nila ang bahay ng isang abusadong meyor sa Cagayan at limasin ang armori.

Nireyd ng BHB ang bahay ni Meyor Eulogio Agatep ng Lasam sa Barangay Callao Sur noong Hunyo 20. Ang bahay ni Agatep ang nagsisilbi ring bolahan ng hweteng sa

munisipalidad.

Nasamsam ng BHB ang isang M16, limang 12-gauge shotgun, isang *sniperscope* at mga bala. Naisagawa ng mga Pulang mandirigma ang reyd na walang putok sa loob lamang ng 15 minuto. Madaling nakalapit at nakapasok sa bahay ang mga gerilya sa pamamagitan ng pagpapanggap na mga sundalo ng guberno.

5 sundalo, patay sa Abra at Kalinga

LIMANG elemento ng kaaway ang napatay sa dalawang magkahiwalay na aksyong militar ng BHB sa Abra at Kalinga nitong Hunyo.

Sa Kalinga, inambus ng isang iskwad ng Leo Cawilan Command ang mga nag-ooperasyong sundalo ng 21st IB sa pagitan ng mga baryo ng Lower Taloctoc at Tanglag sa Lubuagan noong Hunyo 29. Isang

sundalo ang napatay at isa ang nasugatan.

Sa Abra, tatlong elemento ng 41st IB at Engineering and Construction Battalion ang napatay at isa ang nasugatan nang salakayin ng isang iskwad ng Agustin Bernalen Command ang kanilang kampo sa Caganayan, Tineg noong madaling araw ng Hunyo 28.

Mga pulis, inambus sa Catanduanes

INAMBUS ng isang yunit ng BHB sa ilalim ng Nerissa San Juan Command ang mga tropa ng PNP sa Barangay Mayngaway, San Andres, Catanduanes nitong Hulyo 1. Nasamsam ng BHB ang tatlong maiikling baril.

Nakasakay sa mga motorsiklo ang anim na pulis nang tambangan sila. Napatay si Sr. Insp. Alexander Diaz, *group commander* ng PNP Provincial Mobile Group ng Catanduanes, at si P01 Joselito Tubo Jr. Apat pang elemento ng PNP ang nasugatan.

Mga aksyong militar sa Camarines Sur

TATLONG matatagumpay na aksyong militar ang inilunsad ng BHB at milisyang bayan (MB) sa Camarines Sur mula Hunyo 25-27. Isang tinyente ang napatay sa mga operasyong ito.

Hinaras ng apat-kataong tim ng MB ang Special Operations Team ng 42nd IB sa Tanag, Libmanan nitong Hunyo 27. Napatay sa labanan ang isang 2Lieutenant Bernardo, kumander ng "C" Coy at nasugatan ang ilan pang sundalo.

Bago ito, pinasabugan ng dalawang Pulang mandirigma ng eksplosibo ang nakasakay na mga sundalo ng 65th IB sa Maharlika Highway sa Barangay Pecuaría, Bula nitong Hunyo 26. Patungo noon ang mga sundalo sa hedkwarters ng 9th ID sa bayan ng Pili mula sa Ligao City. Maraming nasugatan sa hanay ng militar.

Hinaras din ng BHB ang detatsment ng "B" Coy ng 31st IB sa Barangay Taisan, Sipocot nitong Hunyo 25. May ilang namatay na mga sundalo, ayon sa ulat ng mga nakasaksing sibilyan.



Malawak ang suporta sa *impeachment* kay Arroyo

Sunud-sunod na mga bagong kasong *impeachment* ang isinampa ng iba't ibang personahe, organisasyon at mga sektor laban kay Gloria Macapagal-Arroyo nitong nagdaang dalawang linggo. Ultimong layunin sa pagsasampa ng mga kasong ito laban kay Arroyo ang mapatal-sik siya sa pamamagitan ng *impeachment*. Pero dahil batid pa rin ng mga nagdemanda ang malaking posibilidad na ibabasura lamang ng mga maka-Arroyong kongresista ang kaso, minimum nilang layunin na maisiwalat man lamang sa pamamagitan ng Kongreso ang mabibigat na krimen ni Arroyo laban sa mamamayan.

Anim na kaso na ng *impeachment* ang hiwa-hiwalay na isinampa. Sa pamamagitan nito, sinisikap lutasin ng mga anti-Arroyong pwersa ang iba't ibang teknikalidad tulad ng usapin kung anong petsa talaga natatapos ang "isang taong palugit" bago pahintulutan ang panibagong pagsasampa ng kasong *impeachment*. Pilit itong inuukilkil ng mga kongresistang maka-Arroyong nagnanais hadlangan ang proseso ng *impeachment*. Gayundin, sa sunud-sunod na pagsasampa ng kaso, pinanghahawakan ng mga anti-Arroyong pwersa ang inisyatiba upang hindi na ito guluhin at masabotahe. Pinakaiwasan nila ang nangyari noong isang taon

nang maunang magsampa ng mahinang kasong *impeachment* ang abugado ng pamilyang Marcos na si Oliver Lozano. Karakarakang ibinasura ang kaso dahil sa kawalan nito ng merito at naunsyami ang pagpapatal-sik kay Arroyo sa pamamagitan ng *impeachment*.

Noong una'y minamaliit at kinukutya ng Malakanyang ang tinaguriang "impeachment ng mamamayan laban kay Arroyo." Subalit di naglao'y hindi na nito maitanggi ang malawak na pagkakaisa at suporta para rito ng iba't ibang sektor ng mamamayan.

Sinentruhan ng mga bagong kasong *impeachment* ang tatlong pangunahing reklamo laban kay Ar-

royo:

1. Pagpapairal ng mga hakbanging pandiktador at mga pasis-tang krimen. Kabilang dito ang pagsupil sa karapatan sa malayang impormasyon, pagpapahayag at pagtitipon; ang pag-utos at pang-uupat ni Arroyo ng mga pamamaslang ng AFP at mga *death squad* nito sa mga aktibista at taong-midya; pagharang sa mga pagsisiyasat ng lehislatura na may kaugnayan sa mabibigat na kasong kriminal ni Arroyo; gayundin ang mga hinusgahan na ng Korte Suprema na mga paglabag sa konstitusyon, pag-abuso sa kapangyarihan ng presidente at paglabag sa mga karapatang sibil ng mamamayan tulad ng mga kautusan at hakbangin sa balangkas ng Presidential Proclamation 1017, Executive Order 464, *calibrated preemptive response*, at iba pa.

2. Malawakang pandaraya sa eleksiyong 2004, kabilang ang pagpapalit ng mga *ballot box* at manipulasyon ng mga boto, na pinatampok ng direktang pakikipagkut-saba ni Arroyo mismo kay COMELEC Commissioner Virgilio Garcillano at pagkaimbwelto rin ng ilang mga namumunong heneral na pawang nailantad sa kumalat na "Hello Gar-ci" tape.

3. Malakihang korapsyon, kabilang na ang paggamit ng malalaking pondo (hanggang mga ₱6 bilyon) mula sa iba't ibang ahensya ng gubyrerno para gastusin sa kampanyang elektoral ni Arroyo at panunuhol sa mga pambansa, kongresyunal at lokal na upisyal ng gubyrerno, tulad ng mga naisiwalat na pagnakaw ni Arroyo at mga alipures niya sa bilyun-bilyong pondo mula sa programang Ginintuang Masaganang Ani, *road users' tax*, mga nabawing nakaw na yaman ng mga Marcos, at malalaking kontrata ng gubyrerno na pinasok at personal na pinakinabangan niya at ng malalapit sa kanya. **AB**

Sunud-sunod na kaso

Hunyo 26. Humigit-kumulang 300 organisasyon at kilalang mga personaheng kabilang sa Citizens' Impeachment Case versus Gloria Macapagal-Arroyo ang naglamay sa Kongreso upang tiyaking sila ang unang makapagsasampa ng kaso. Kabilang sa mga unang lumagda sa kaso sina Zenaida "Nini" Quezon-Avanceña, anak ng dating pangulong Manuel L. Quezon; National Artist for Literature Bienvenido Lumbera; Renato Reyes ng Bagong Alyansang Makabayan; Bro. Eddie Villanueva ng Bangon Pilipinas; Hyatt 10; at iba pang nagbitiw na upisyal ng rehimeng Arroyo.

Hunyo 27. Pinangunahan ni dating Vice Pres. Teofisto Guingona Jr. ang pangalawang isinumi-teng reklamo batay sa mga kongklusyon ng Citizens Congress for Truth and Accountability. Sinabayan ito ng panawagan ni Guingona para sa *civil disobedience* ng mamamayan sakaling muling harangin ng mga tauhan ni Arroyo ang bagong prosesong *impeachment*.

Hunyo 28. Isa pang kasong *impeachment* ang isinampa sa pangunguna ni Caloocan City Bishop Deogracias Yñiguez. Binatikos ito ng Malakan-yang subalit umani ng suporta ang kanyang hak-bang mula sa mga pinuno ng Catholic Bishops Conference of the Philippines, kabilang ang presidente nitong si Archbishop Angel Lagdameo at sina Archbishop Oscar Cruz ng Pangasinan at Gaudencio Cardinal Rosales ng Maynila.

Hunyo 28. Mga kabataan ang bumuo ng ika-apat na grupong naghain ng kaso. Pinangunahan ito ng Youth Demanding Arroyo's Removal (Youth-DARE) na kinatawan ni Abigail Binay, batang abugadong anak ni Mayor Jejomar Binay ng Makati City.

Hulyo 3. Sa pangunguna ni Fr. Rolly de Leon ng Norzagaray, Bulacan, isinampa ang ikalimang kasong *impeachment*. Kasama ni Father de Leon si Erlinda Cadapan, dating *campaign manager* ni Arroyo at 14 na iba pang organisasyong nagtataguyod ng karapatang-tao sa iba't ibang rehiyon.

Hulyo 6. Pinakahuling nagsampa ng kaso ang mahigit 100 kababaihan sa pangunguna ng GABRIELA, Gabriela Women's Party at Samakana.

Samantala, noong Hulyo 5 ay pumirma sa isa pang kasong *impeachment* ang Be Not Afraid Movement ni Sen. Panfilo Lacson at mga kapanalig ni Sen. Gregorio Honasan. Pormal nilang isasampa ang kaso sa Hulyo 24. AB



Masiglang edukasyong masa sa Cagayan

Dalawang taon nang masiglang naipatatupad ang programa sa edukasyong masa sa Northern Front ng Cagayan Valley. Bunga ito ng kapasyahan at mga kaparaanang iniluwal ng panrehiyong kumperensya hinggil sa edukasyon na ginanap noong 2004.

Mula noon, mabilis at maramihang napagtatapos ang masa sa Pambansa-Demokratikong Paaralan (PADEPA), pati na sa Pangkalahatang Kursong Masa (Pakum), Espesyal na Kursong Masa (Eskum) at iba pang batayang pag-aaral.

Para mabisang matugunan ang kapasyahan ng panrehiyong kumperensya, naglunsad muna ang Northern Front ng panlarangang kumperensya sa edukasyon na dinaluhan ng lahat ng upisyal sa edukasyon, propaganda at pangkultura hanggang sa antas ng iskwad. Dinaluhan din ito ng buong Komiteng Larangan.

Kagyat pagkatapos ng panlarangang kumperensya ay sinimulan ang pagsasanay ng mga instruktur. Ang unang bats ay kinabilangan ng 13 Pulang mandirigma at apat na myembro ng organisasyong masa. Kinabukasan, 10 pang magsasaka ang sinanay maging instruktur. Samantala, ang unang bats ng mga nagsanay ay agad na lumarga sa mga baryo para ibreyktru ang malawakang pagbibigay ng pag-aaral. Inuna nila ang isang sityo sa loob ng isang binabawing erya.

Umaga pa lamang ay nabigyan nila ng Eskum-Kababaihan ang grupong pang-organisa ng Makibaka sa lugar. Kinahapunan, pinuntahan nila ang bahay na may pinakamalaking telebisyon at karaniwang pinu-

puntahan ng karamihan ng tagabaryo. Hiniling ng mga bagong sanay na instruktur na makapagdaos doon ng pulong masa kinagabihan at magamit ang TV at VCD *player* para makapagpalabas ng dokumentaryo. Nang anyayahan ang taumbaryong dumalo sa pulong, lalo silang nahimok dahil kabilang sa adyenda ang talakayan hinggil sa pagpapabura sa interes ng kanilang utang sa mga usurero sa harap ng malaking pinsalang dulot ng malakas na bagyo sa kanilang mga pananim.

Umabot sa 94 katao ang dumaating noong gabing iyon at nakakuha ng Maikling Kurso sa Lipunan at Rebolusyong Pilipino (MKLRP) sa loob ng apat na oras. Tatlong mandirigmang katatapos lamang magsanay bilang instruktur ang nagbigay ng pag-aaral sa tulong ng VCD na nagsilbing suplemento. Agad naiugnay ng mga nagsidalang ilulunsad na “kampanyang bura-utang” sa kanilang kapighan at pagsasamantala bilang mga magsasaka at sa pangangailangan ng rebolusyonaryong pagkilos para baguhin ito.

Makailang beses na naulit ang gayong matagumpay na karanasan. Sa ikalawang sityo ay 82 katao ang nakatapos ng MKLRP. Sa ikatlo ay 41 katao ang nakatapos ng Eskum. At sa ikaapat ay may 81 katao pa ang nakakuha ng MKLRP. Sa ikalawa hanggang ikaapat na pag-aaral, ang mga instruktur mula sa BHB ay nagkaroon na ng maraming katuwang na instruktur mula sa hanay ng mga magsasakang nakakuha na ng MKLRP at Eskum.

Sa kabuuan, sa apat na sityong inikot sa loob ng apat na araw ay

298 katao ang nabigyan ng iba’t ibang batayang kursong masa. Sa ikalawang hati ng 2004, mahigit 680 ang nakakuha ng MKLRP at Eskum Pinagsanib; 418 ang nakakuha ng MKLRP; 275 ang nakakuha ng Eskum-Magsasaka; 92 ang nakakuha ng Eskum-Kababaihan; 57 ang nakakuha ng Eskum-Kabataan; 57 ang nakapag-aral ng Rebolusyonaryong Gabay sa Reporma sa Lupa; 21 ang nakakuha ng Limang Gintong Silahis; 430 ang nakapag-aral

ng Comprehensive Agreement on Respect for Human Rights and International Humanitarian Law; at 17 ang nakakuha ng Kursong Aktibista.

Magdadalawantaon nang nasusustini ang gayong masiglang pagbibigay ng pag-aaral sa Northern Front. Pagsapit ng 2005, masayang iniulat

ng mga kagawad ng larangan na sa pinakahuli nilang kampanyang edukasyon ay mahigit 2,000 magsasaka ang nabigyan ng mga aralin sa PADEPA sa loob ng tatlong buwan.

Naging susi sa pagsigla ng edukasyong masa ang matamang pagtutok ng mismong komite ng Partido sa larangan. Sa antas na ito nagsimula ang pagsisikap na tashin ang kalagayan at tukuyin ang mga solusyon upang sumigla ang gawain sa edukasyong masa. Ito ang nanguna sa pagpapatupad ng mga plano at hakbangin sa pagsasanay, pagbubuo at pagpapagana ng mga grupong instruktur sa hanay ng BHB at masa.

Signipikanteng mabanggit na anim sa pito-kataong kwerpo ng mga instruktur mula sa hukbong bayan ang nagmula sa uring mag-

sasaka. Ibig sabihi’y matagumpay na nabaka ng mga instruktur na magsasaka ang kanilang pagkama-hiyain para maipagtagumpay ang kampanyang edukasyon.

Napatunayan din ng kanilang karanasan na ang gawaing edukasyon, gaya ng lahat ng gawain, ay dapat mahigpit na inilalapit sa interes ng masa upang mapasigla at maipatupad. Sa pag-iimbiba sa mga pag-aaral, hindi sapat na sabihing “pumunta kayo sa pag-aaral mamayang gabi.” Nahihimok ang interes ng masa sa pag-aaral kung ipinaliliwanag ang halaga ng edukasyon sa pagtukoy ng solusyon sa problema sa kalamidad, usura, upa sa lupa, pangangamkam ng lupa at iba pa.

Sa mismong pag-aaral, masigla ang paglahok nila kung mahigpit na iniuugnay ang kongkretong kalagayan ng mga magsasaka at iba pang sektor sa paksang kanilang pinag-aaralan. Nakikita rin ng masa ang mahigpit na kabuluhan ng kanilang natanggap na pag-aaral sa mga solusyon sa mga kagyat at praktikal na problema nila sa pamamagitan ng pagsusunod ng mga pulong masa at pagpapalano para sa kampanyang masa pagkatapos ng mga pag-aaral.

Higit sa lahat, naipakita sa pagsusulong ng edukasyon sa Northern Front kung paano sumasalig ang BHB sa lakas at kakayahang ng masa. Nang masanay at mabigyan ng kumpyansa sa pagbibigay ng pag-aaral, tumaas ang kaisiglahan ng mga magsasaka sa gawaing edukasyon. “Kaya rin pala naming magturo!” sabi ng isa.

Ikinatutuwa ng mga kasama sa BHB na marinig na nanonood ng VCD ng Eskum-Magsasaka ang mga kabahayan kung saan mga lokal na lider magsasaka na ang nangunguna. Nariyang magpunta na ang mga magsasaka sa eryang pinagpapalawakan at mag-ulat sa Hukbo na nakapagpatapos sila ng 50 katao ng

At kung dati’y hindi nakasanayan ng mga magsasaka ang pagbabasa at pag-aaral, ngayo’y tinatanong na nila ang BHB kung “apay ni Juan adda PADEPA nan ket siak awan pay?” (Bakit may PADEPA na si Juan at ako’y wala pa?)

MKLRP sa pamamagitan ng pagpapakilos sa mga kasapi ng kalapit na lokal na sangay ng Partido, mga grupong pang-organisa, at mga lider ng organisasyong masa para magbigay at maghanda ng mga pag-aaral. At kung dati'y hindi nakasanayan ng mga magsasaka ang pagbabasa at pag-aaral, ngayo'y tinatanong na

nila ang BHB kung "apay ni Juan adda PADEPA nan ket siak awan pay?" (Bakit may PADEPA na si Juan at ako'y wala pa?)

Dahil sa masiglang kampanyang edukasyon, bukambibig na ng mga magsasaka sa Northern Front ng Cagayan Valley ang terminong PADEPA. AB

CARP: Maanomalya at inutil

Malaking panloloko! Ito ang nagkakaisang tugon ng masang magsasaka sa pakana ng rehimeng Arroyo na palawigin pa ang inutil na Comprehensive Agrarian Reform Program (CARP) hanggang taong 2013.

Ang gayong balak na pagpapalawig ng CARP ay nakabatay umano sa pangangailangang magpamahagi ng 500,000 ektarya pang lupain. Isa itong malaking panloloko dahil ang totoo, wala pang signipikanteng bahagi ng mga lupaing marapat na ipamahagi ang aktwal na napasakamay ng mga magsasaka mula nang unang ipatupad ang CARP noong 1988. Katunayan, lalong dumami ang nawalan ng lupa at lalo pang lumawak ang mga lupaing saklaw ng dati nang malalaking panginoong maylupa sa bansa.

Ang tunay na layunin ni Arroyo sa pagpapalawig sa CARP ay gamitin ang

pondo nito para sa sariling kapakinabangan. Alinsunod sa batas, isa sa mga dapat pagkukunan ng pondo ng CARP ang \$683 milyon o P38 bilyong nakaw na yaman ng mga Marcos. Ngunit halos nasaid na ito ng rehimen. Noong nakaraang taon, matatandaang umabot sa P27 bilyon mula sa kayamanang ito ang kinurakot gamit ang iba't ibang umano'y suportang programa sa ilalim ng CARP. Dagdag pa rito ang P544 milyong pondo na ginamit sa maanomalyang programang pang-abono na ginastos ni Arroyo para sa kanyang kampanyang pang-eleksyon noong 2004.


Sa ngayon, balak ni Arroyo na simutin ang P7 bilyong natitira sa nakaw na yaman ng mga Marcos na hawak na ng

gubyrno. Gusto rin niyang kopohin ang dagdag na pondo mula sa iba't ibang ahensya ng gubyrno. Kabilang dito ang P7.77 bilyon mula sa Overseas Development Assistance (ODA) na nakalaan din sa CARP at ang karagdagang \$35 milyong nakaw na yaman ng mga Marcos (P1.85 bilyon sa palitang P53:\$1) na nakalagak ngayon sa isang *brokerage account* sa New York City, USA.

Matatandaang ginagastusan ang CARP sa pamamagitan ng espesyal na pondong Agrarian Reform Fund o ARF na nakapailalim sa kontrol ng presidente. Mula 1988 hanggang 2006 ay tinatayang umabot na sa mahigit P500 bilyon ang nailalaan para rito.

Saksakan ng kainutilan. Sa 18 taong implementasyon ng CARP, mahigit isang milyong ektarya lamang ang nasaklaw nito sa kabuuang 10.3 milyong ektaryang orihinal na target na lupang dapat saklawin ng programa. Sa halip na mabaklas ang malalawak na pag-aari ng mga panginoong maylupa, nagawa pa nilang lalong palawakin ang hawak nilang lupain sa pamamagitan ng paggamit ng mismong mga probisyon ng CARP. Nagamit nila ang iba't ibang pakana katulad ng Stock Distribution Option (SDO), paglimita sa sasaklawing lupa sa maisan at palayan, paghati-hati ng lupa sa mga kamag-anak para hindi masaklaw ng programa, pagpapalit-gamit ng lupa mula agrikultural tungong komersyal at industriyal at iba pang klasipikasyong hindi saklaw ng CARP.

Hanggat di nila nakukumpleto ang bayad, hindi pa lubusang pag-aari ng mga magsasaka ang ipina-



ngangalandakang naipamahagi nang isang milyong ektarya.

Tatlumpung taon itong pahulugan, kadalasan sa presyong idinidikta ng panginoong maylupa. Samantala, hindi pa titulo kundi mga Certificate of Land Ownership Award o CLOA lamang ang ibinibigay sa magsasaka. Magagawaran lamang sila ng Emancipation Patent (EP), na katumbas ng titulo, kapag nakumpleto na nila ang pagbabayad.

Dahil sa korapsyon at iba't ibang mga depekto at butas ng batas, mahigit 2,000 CLOA at EP na sumasaklaw sa 380,000 ektarya at libu-libong mga pamilya ng magsasaka ang nakansela noong 2004, kasama na ang mga EP na naipamahagi na noong nakaraang mga dekada. Sa 2.1 milyong benepisaryo umano ng CARP, 1.7 milyon pa lamang ang may hawak na EP at CLOA noong Disyembre 2004. Ang maliit na porsyento pa lamang na nabigyan na ng EP ang lubos nang nagmamay-ari ng lupang binubungkal.

Ang kumbersyon ng lupain ay nagresulta sa pagbaba ng kabuuang nabubungkal na lupa mula 9,974,871 ektarya noong 1991 tungong 9,670,793 ektarya noong 2002. Hindi pa kasali rito ang lupaing dumaan sa pagpapalit-gamit para makaiwas ang panginoong maylupa sa CARP.

Marami ring mga lupain ang naremata dahil hindi na nakabayad sa amortisasyon ang mga magsasaka sa iba't ibang kadahilanan, pangunahin na ang kawalan ng suportang serbisyo mula sa gubyrno at pagbaba ng presyo ng kanilang mga produkto.

Karaniwan nang nangyayari na ang mga CLOA at EP ay muling nabibili ng mga panginong maylupa at mga *commercial* at *real estate developer*. Kaya talagang malaking kahungkagan ang ipinangangalandakang tagumpay ng CARP. **AB**

Mga Maoista sa Nepal, umaani ng tagumpay

"Mga Maoista ang dapat mamuno sa bansang ito. Nakita na ng mamamayan ang monarkiya at ang mga partidong parlamentaryo at ang nais ng kalakhan ng masa ngayon ay ang mga Maoista naman ang mamuno."

Ito ang pahayag nitong Hunyo 30 ng tagapangulo ng Communist Party of Nepal-Maoist (CPN-M) na si Pushpa Kamal Dahal, mas kilala sa kanyang pangalan-sa-pakikibak na Prachanda. Binitiwang niya ang pahayag habang nagpapatuloy ang negosasyon sa pagitan ng rebolusyonaryong kilusan at ng bagong gubyrno sa Nepal hinggil sa pagbabago ng konstitusyon at pagbubuo ng transisyunal na gubyrnong hahalili sa ibinagsak na monarkiya.

Nagkasundo ang gubyrno at mga rebolusyonaryong pwersa noong Hunyo 16 na magsama sa itatayong pamahalaang pantransisyon habang pinaghahandaan ang eleksyon para sa kapulungang tagapagtatag (*constituent assembly*) na magpapasya sa magiging anyo ng bagong gubyrnong pambansa.


Ang kasunduan ang pinakahuiling inabot ng pakikipag-alyansa ng CPN-M sa mga ligal na partido

pulitikal laban sa absolutong paghahari ni Gyanendra. Umaani ng mga tagumpay ang mga pwersang pinamumunuan ng CPN-M mula nang mapaurong ng unos ng kilusang masa at armadong pakikibak ang kinamumuhang hari.

Kapangyarihan ng hari, binali. Pinakamakabuluhang tagumpay ng mga rebolusyonaryong pwersa at sambayanang Nepali ang pagwawakas sa kapangyarihang pulitikal ni Haring Gyanendra. Matagumpay nila itong naigiit bunsod ng tuluy-tuloy nilang pagsusulong ng digmang bayan sa kanayunan at mga protestang masa sa kalunsuran at malawak na bahagi ng bansa, at ng di maitatatwang malaking impluwensya ng CPN-M sa sambayanang Nepali.

Ganap nang ibinasura ng parlamento ang awtoridad ng hari na mag-apruba ng mga batas at ang kanyang kumand sa hukbo ng estado. Inoobliga na rin ang hari na magbayad ng buwis katulad ng mga ordinaryong mamamayan.

Ibinasura na rin ng parlamento ang "batas laban sa terorismo" na ipinatupad ng hari at iniutos ang pagpapalaya sa mga ibinilanggo sa ilalim ng naturang batas. Pinalaya na ang 190 detenidong Maoista at 160 pa ang nakatakdang palayain. Sinimulan na rin ang pag-aresto sa mga pwersa ng monarkiya na sangkot sa marahas na pa-



Kasamang Prachanda



nunupil sa mga kilos protesta noong Abril.

Ang pagbabasura sa absolutong monarkiya at pagtatayo ng demokratikong republika ang pangunahing iginiit ng mga pwersang pinamumunuan ng CPN-M nang lumahok sila sa koalisyong naglunsad ng malawakang kampanyang protesta.

Ipinupursigi ngayon ng CPN-M na tuluyan nang maalis sa babalangkasing bagong konstitusyon magiging ang "seremonyal" na katayuan ng hari sa estado.

Sekularisasyon ng estado. Tagumpay din ng rebolusyonaryong kilusang masa ang deklarasyon ng parlamento noong Mayo 18 na ang Nepal ay isa nang estadong sekular (hindi relihiyoso). Winakasan ng deklarasyon ang 238 taong katayuan ng Hinduismo bilang upisyal na relihiyon ng Nepal na bunga ng libong taong dominasyon ng India sa nakaraan. Iwinaksi na nito ang upisyal na paniniwalang ang hari ay katawang-tao ni Vishnu, isa sa mga pangunahing diyos ng mga Hindu.

Panimulang hakbang ito sa pagsisikap na pawiin ang pyudal at rasistang dominasyon ng mga etnikong Hindu sa isang bansang binubuo ng mahigit isandaang grupong etnikong nagsasalita ng humigit-kumulang isandaang wika at may mahigit sampung relihiyon.

Dispusisyon ng mga armadong pwersa. Iginigiit

ngayon ng US, India at ilang reaksyunaryong pwersang nagsisikap makapanatili ng dominasyon sa Nepal ang pagsasalong ng People's Liberation Army (PLA) ng mga armas nito bilang kundisyon sa pakikibahagi sa estado poder. Nagbabanta ang US na iuuring nito ang milyun-milyong dolyar na ayuda sa bansa oras na maupo sa gubyrno ang mga rebolusyonaryo nang hindi nagbababa ng sandata.

Ngunit walang planong magdisarma ang PLA. Ani Prachanda, pananatilihin ng CPN-M ang kontrol sa rebolusyonaryong hukbong binubuo ng pitong dibisyon at sa milisyang bayan na binubuo ng 100,000 kawal.

Sa halip, ipinapanukala ng CPN-M ang pagtatatag ng bagong hukbo ng bagong gubyrno sa pamamagitan ng pagsasanib ng PLA at ng rereorganisahing reaksyunaryong Nepal Army. Ang pinagsanib na hukbo ay ilalagay sa kumand ng ihahalal na *prime minister*.

Bukod sa inaasahang malakas na pusisyon nito sa itatayong bagong gubyrno, ang kontrol ng rebolusyonaryong kilusan sa 80% ng teritoryo ng Nepal ay mapagpasya sa magiging katayuan nito sa pagsusulong ng mga pagbabago at pagtatakda ng kaayusang panlipunan sa bansa sa kagyat na hinaharap.


Ang Nepal ay nasa pagitan ng India at China. May populasyon itong 27 milyon.

AB

Iligal ang pagbibimbin sa Guantanamo

"Iligal at di saklaw ng awtoridad." Ito ang desisyon ng Korte Suprema ng US sa pagbibimbin at di pagsasampa ng kaso ng rehimeng Bush sa mga detenido sa Guantanamo Bay, Cuba.

Mayorya ng mga hukom ng Korte Suprema ang kumastigo sa paglabag ng gubyrnong Bush sa konstitusyon ng US at sa Geneva Conventions at gayundin, sa paglapastangan nito sa tungkulin ng mga



korteng sibilyan na dinggin ang mga kaso ayon sa kapangyarihang ibibigay ng Kongreso. Ang hatol na ibina-ba nitong Hunyo 27 ay ikinatuwa ng maraming tagapagtanggol sa karapatang-tao sa buong mundo at ng mga lumalaban sa pagmamalabis at arogansya ng imperyalistang US sa

paglapastangan sa mga karapatang-tao, karapatang sibil at sobe-ranya ng mga bansa.

Ang kaso laban sa rehimeng Bush ay isinampa ng mga abugado ng isang detenidong Afghani na kinasuhan ng isang espesyal na korteng militar ng terorismo at pakikipagkutsaba para maghasik ng terorismo. Ang hukuman ay binuo para litisin ang mga bilanggo sa kampo militar sa Guantanamo Bay. Karamihan sa mga detenido ay hinuli sa Afghanistan, Iraq at marami pang bansang Arabo at dinala sa nasa-bing base militar dahil suspetsado silang myembro ng al Qaeda at Taliban. Lahat sila ay nakaranas ng tortyur at sarisaring panggigipit at pambabastos. Karamihan ay walang abugado at pinagbabawalang madalaw ng kanilang mga pamilya,



ng midya o mga personalidad na nagtatanggol ng karapatang-tao. Lumakas ang pagkundera ng mamamayan sa mga iligal na kulungan nang mabunyag sa midya na may tatlong detenido na nagpatiwakal noong Hunyo 10.

Ito ang pangalawang kaso ng iligal na pagkukulong ng mga detenido pulitikal sa Guantanamo na isinampa laban sa rehimeng Bush. Noong 2003, nagdesisyon din ang Korte Suprema ng US na iligal ang walang taning na pagbibimbin sa mga pinagsususpetsahang terorista kahit walang kasong kinakaharap at idiniin ang karapatan nilang magkaroon ng abugado.

Ayon sa mga internasyunal na batas sa digma, ang gayong mga detenidong pulitikal ay may karapatang magtamasa ng ayudang ligal. Dapat ding kagyat na dinggin ang kanilang mga kaso. Bawal ang tortyur at panggigipit, pambabastos at diskriminasyong nakabatay sa lahi. Hangga't maaari, ang mga detenidong pulitikal ay dapat ibalik sa kanilang mga bansa para don dinggin ang kanilang mga kaso. Sa 450 detenidong pulitikal sa Guantanamo, 10 pa lamang ang kinakasuhan mula 2001.

Bagamat malaking tagumpay ang pagdedeklara ng Korte Suprema na iligal ang itinayong mga korteng militar, hindi nito inaalís ang karapatan ng Kongreso ng US at rehimeng Bush na gumawa ng batas na bubuo ng mga espesyal na korteng militar para dinggin ang mga kaso ng mga pinagsususpetsahang myembro ng al Qaeda at Taliban. Hindi rin nito ipinasasara ang kulungan sa Guantanamo o sa iba pang lugar na pinaglalagyan ng mga di pa rin kinakasuhang detenidong pulitikal o ipinatitigil ang walang pakundangang kalakaran ng US na manghuli ng mga suspetsadong terorista. AB

Bakit nagpalipad ng mga *missile* ang North Korea?

Pitong *missile* ang pinalipad ng North Korea patungong Pacific Ocean nitong Hulyo 4 bilang bahagi ng patuloy nitong pagpapalakas ng depensang nukleyar laban sa mga banta sa pambansang seguridad. Tulad ng inaasahan ay binatikos ng US at ng pinakamahihipit nitong mga alyado ang ginawang *test launch* ng North Korea.

Ilang taon nang pinaunlad ng North Korea ang nukleyar na kapasidad nito para tugunan ang mga pangangailangan nito sa serbisyo publiko, industriya at depensa, pero magiit itong tinututulan ng US. Bagamat ang US ang may pinakamalaking kapasidad sa armas nukleyar at iba pang mapamuksang sandata sa buong mundo, doble-kara nitong binabatikos ang anumang pagsisikap ng ibang bansa na makapagpaunlad ng sariling lakas nukleyar kahit man lamang para lumikha ng elektrisidad, laluna kung ang mga bansang iyon ay matatag na nagtataguyod ng kanilang kasarinlan laban sa imperyalismong US.

Dahil sa paggugumiit ng North Korea sa pambansang soberanya nito, kabilang ang karapatang magprodyus ng sariling mga rekurso sa enerhiya at magpalakas ng depensa, binansagan ito ng US na bahagi ng "*axis of evil*" o sentro ng kasamaan. Isa pang bansang binansagan ng US na bahagi ng "*axis of evil*" ang Iraq, na sinalakay na ng US noong 2003 dahil sa gawa-gawang paratang na nag-iingat ito ng mga sandata para sa malawakang pamiminsala. Isa pa ang Iran na matinding pinag-iinitan at binabantaang sasalakayin ng US dahil sa patuloy na pagpapaunlad nito ng kakayahang nukleyar sa kabila ng pagpupumilit ng US na patigilin ito.

Ang gayong mga pagbabanta ng US ay nagbunsod ng ibayong pagsisikap sa North Korea na palakasin pa ang sistemang pandepensa nito. Ipinagpapatuloy din ng Iran ang pagpapaunlad ng lakas nukleyar para lumikha ng enerhiya para sa industriya at konsumo ng mamamayan.

Sa halip na tuwirang makipagharap, idinadaan ng US ang pambabraso sa North Korea sa usaping nukleyar sa mga negosasyong kinasasangkutan ng anim na bansa—ang US, North Korea, South Korea, Japan, China at Russia. Sinuspindi ng North Korea ang pakikipag-usap noong Nobyembre dahil nais nito na direktang makipag-usap ang US. Patuloy itong tinatanggihan ng US dahil tatampok ang katotohanang sariling interes lamang ang pinangangalagaan nito. Ayaw solohin ng US ang anumang konsesyon o insentibong iaalok sa North Korea kapalit ng pagtigil sa pagpapaunlad ng teknolohiyang nukleyar. Umiwas din ang US na matali sa anumang kasunduang maaaring maglimita sa paggamit ng mga sandatang nukleyar.

Ang pagpapalipad ng North Korea ng mga *missile* nitong Hulyo 4 ay pagpapakita na may kakayahan itong lumaban at hindi mababasta-basta ng US. Ipinaaabot nito na mas makabubuting tuwirang makipagharap dito ang US sa mga usaping bilateral upang resolbahin ang mga usapin sa pagitan ng dalawang bansa. AB

Pagsibak sa ambasadador, tanda ng grabeng pagpapakatuta ni Arroyo

GALIT na sinibak ni Arroyo bilang Ambassador sa US si Alberto del Rosario dahil sa kabiguan ng huwad na presidente na maipamalas ang kanyang pagkatuta sa kanyang among imperyalista. Ito'y taliwas sa pahayag ng Malakanyang na kusang nagbitiw ang naturang ambasadador.

Pangunahing ikinagalit ni Arroyo kay del Rosario ang kabiguan niyang makumbinsi si President George W. Bush ng US na imbitahan si Arroyo sa Washington. Maalaon nang inaasam ni Arroyo na makabisita sa US para makapuntos kay Bush at matiyak ang patuloy na basbas ng US sa kanyang rehimen.

Bago ito, ikinagalit din ni Arroyo ang kabiguan umano ni del Rosario na sansalain ang sunud-sunod na mga pagbatikos sa kanyang gubyrno mula sa mga insti-

tusyong Amerikano, kabilang ang Heritage Foundation, at mula sa mga prestihiyosong pahayagan katulad ng *New York Times* na naglabas ng editoryal na tumuligsa sa anito'y mala-diktador na tendensya ni Arroyo.

Nagsimulang magalit si Arroyo kay del Rosario noon pang 2005 nang tanggihan nito ang pag-upa sa Amerikanong *lobbying firm* na Venable LLP para pabanguhin ang imahen ni Arroyo at kumbinsihin ang Kongreso ng US na maglaan ng pondo para sa pagbabago ng konstitusyon. Direktang pagsalungat ito sa interes ng pamilyang Arroyo dahil bukod kay National Security Adviser Norberto Gonzales, kabilang sa mga nakipagnegosasyon para sa milyun-milyong kontrata ng Venable LLP ang kapatid ni Arroyo na si Diosdado "Buboy" Macapagal Jr.

Mga dokumento ng usapang pangkapayapaan, isinalibro ng NDFP

ISANG librong naglalaman ng mahahalagang dokumento ng usapang pangkapayapaan ang inilunsad ng NDFP nitong Hunyo 26.

Nasa libro ang lahat ng mayor kasunduang narating ng NDFP at reaksyunaryong gubyrno mula 1992 nang mapagtibay ang The Hague Joint Declaration. Ang deklarasyong ito ang balangkas na sinusunod sa mga pag-uusap ng dalawang panig.

Sa mensahe niya sa paglulunsad ng libro, tinalakay ni Ka Jose Ma. Sison, punong konsultant sa pulitika ng NDFP, ang mabunga bagamat patay-sinding takbo ng usapan sa nakaraang 14 na taon.

Labimpito nang kasunduan ang narating ng dalawang panig sa usapang pangkapayapaan. Pinakamahalaga sa mga ito ang CARHRIHL.

Huwag gamitin ang bantang pagputok ng Bulusan para sa militarisasyon at panghihimasok ng mga pwersa ng US—NDFP


BINALAAN ng National Democratic Front of the Philippines (NDFP) ang rehimeng Arroyo at ang US na huwag gamitin ang pag-alburoto ng Mount Bulusan sa Sorsogon para magbuhos ng malaking pwersa ng AFP sa mga apektadong lugar at magpapasok ng mga tropang Amerikano sa ngalan ng "humanitarian operations."

Inilabas ng NDFP ang babala sa pamamagitan ni Ka Fidel Agcaoili, myembro ng *peace panel* nito. Ayon kay Agcaoili, mahalaga ang babala sa harap ng pag-annunyo kamakailan ng AFP na isa ang Sorsogon sa mga pupuntirahin ng "all-out war" ng rehimen laban sa rebolusyonaryong kilusan. Makabuluhan din ito dahil sa inaasahang pagtindi ng armadong panghihimasok ng US sa Pilipinas, laluna't mayroon nang binuong kasunduan ang rehimeng Arroyo at US nitong Mayo na nagpapahintulot sa presensya ng mga tropang Amerikano sa bansa para tumugon umano sa mga "di tradisyunal" na banta tulad ng mga kalamidad.

Kasabay nito, sumang-ayon ang NDFP sa panawagang magpairal ng pansamantalang tigil-putukan sa mga bayan sa paligid ng Mount Bulusan habang nasa-sapanganib ang mga ito ng pag-alburoto ng bulkan upang bigyang-laya ang operasyong *relief* at ebakwasyon ng apektadong mamamayan. Nagsimula nang bumuga ng abo at putik ang bulkan noon pang Marso.

Ang tigil-putukan sa mga bayan ng Irosin, Bulusan, Casiguran at Juban ay nagsimula noong Hunyo 12 at mananatili habang mayroon pang panganib at di pa nakakabalik sa normal ang takbo ng buhay ng mga taumbaryo sa kanilang mga komunidad.

Sa ngayon ay may isang linggo nang humuhupa ang pag-alburoto ng bulkan at nagsimula na ring pabalikin sa kanilang mga tahanan ang mga nagsilikas. Gayunpaman, ipinagbabawal pa rin ng Philippine Institute of Volcanology ang pagbalik ng mga bakwit sa mga lugar hanggang apat na kilometro mula sa panaan ng bulkan.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XXXVII Blg. 13
Hulyo 7, 2006
www.philippinerevolution.org

Editoryal

Itigil ang mga pagdukot, lihim na pagbibilanggo at iba pang karahasan sa mamamayan

Labis na karuwagan ang ipinamamalas ng rehimen ng US-Arroyo sa ginagawa nitong walang habas na mga pasistang pag-atake sa mga aktibista, ordinaryong mamamayan, mga rebolusyonaryong pwersa at mga inaakusahan nitong komunista. Ang hindi nito kayang gawin nang harapan, gagawin nito nang patraydor, sa pamamagitan ng mga halimaw na *death squad* at mga espesyal na operatibang walang nirerespetong karapatan at walang sinasantong batas, maging mga batas sa bansa at mga pandaigdigang batas. Nilalait at dinuduraan pa nila ang mga kasunduang nakamit sa usapang pangkapayapaan sa pagitan ng rebolusyonaryong kilusan at ng kanilang guberno.

Animo'y mga nauulol na halimaw ang mga *death squad* na pinakawalan ni Arroyo. Ang mga pinaghihinalaang rebolusyonaryo ay marahas na sinasaklot, lihim na ibinibilanggo sa madi-dilim na kuta,

dinadahas, nilalason at pinagkakaitan ng kahit kating na pagkatao. Walang mga dokumento. Walang mga abugado. Walang pag-aasal-tao. Buhay ang kapalit oras na hindi masunod ang kagustuhan ng mga halimaw.

Walang inaamin si Arroyo at ang kanyang mga alipures. Namimilipit ang mga ito sa pagtanggihan ng kahit pa may mga ebidensya at saksi. Nagbibingi-bingihan lamang si Arroyo sa harap ng umaalingawngaw na kahalilingan ng mga kamag-anak, kaibigan, mga nagtataguyod ng kanilang karapatang-tao at iba pang mamamayan na ilitaw at respektuhin ang karapatan ng mga biktima. Sa harap ng labis na hinagpis ng mga nababahala sa kalagayan ng kanilang mga pinagmamalaskitan, hindi maitago ang kagalakan ng rehimen at mga alipures nito sa militar: Magandang bagay, anila, na dinukot at nawawala ang mga rebolusyonaryo.

Ang "*all-out war*" ni Arroyo



Mga tampok sa isyung ito...

Palayain ang mga dinukot na konsultant ng NDF **PAHINA 3**

Malawak na suporta sa panibagong impeachment **PAHINA 8**

Mga tagumpay ng mga Maoista sa Nepal **PAHINA 12**

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa panugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com